



KEMENTERIAN PEMBANGUNAN  
USAHAWAN DAN KOPERASI

**SIARAN MEDIA**  
**KARNIVAL HARI PENJAJA DAN PENIAGA KECIL PERINGKAT**  
**KEBANGSAAN TAHUN 2023**  
**“PENJAJA DAN PENIAGA KECIL, NADI EKONOMI MADANI”**

---

**PENAMPANG, 7 Disember 2023** - YAB Dato' Seri Anwar bin Ibrahim, Perdana Menteri telah menyempurnakan Majlis perasmian Karnival Hari Penjaja dan Peniaga Kecil Peringkat Kebangsaan Tahun 2023 (HPPK2023) di Buhavan Square, Penampang, Sabah. Program anjuran Kementerian Pembangunan Usahawan dan Koperasi (KUSKOP) yang julung kalinya diadakan di Wilayah Sabah ini merupakan program tahunan sebagai tanda pengiktirafan Kerajaan kepada komuniti penjaja dan peniaga kecil di negara ini.

YAB Perdana Menteri menyampaikan Anugerah Kecemerlangan Penjaja dan Peniaga Kecil kepada 20 orang usahawan yang telah berjaya melonjakkan perniagaan mereka yang bermula sebagai penjaja dan peniaga kecil sehingga mencapai nilai jualan melebihi RM300,000.00 setahun.

Dianggarkan seramai 10,000 orang pengunjung dari seluruh negara dijangka hadir memeriahkan sambutan Karnival HPPK2023 yang berlangsung sepanjang tiga hari ini bermula dari 7 hingga 9 Disember 2023. Turut hadir ialah wakil-wakil dari Kementerian dan Agensi Kerajaan Persekutuan dan Negeri serta wakil rakan strategik HPPK2023 iaitu Gabungan Persatuan Penjaja dan Peniaga Kecil Melayu Malaysia (GPPPKMM) dan Gabungan Persatuan dan Penjaja Malaysia (G3PM).

YAB Perdana Menteri merakamkan ucapan penghargaan dan terima kasih kepada semua yang hadir terutama golongan penjaja dan peniaga kecil yang menzahirkan kesepaduan dan sokongan kepada program HPPK2023 yang bertemakan “Penjaja dan Peniaga Kecil, Nadi Ekonomi MADANI”. Dalam majlis ini, Perdana Menteri juga

menyampaikan watakah pelantikan sebagai Ahli Majlis Perundingan Penjaja dan Peniaga Kecil (M3PK) kepada wakil penjaja dan peniaga kecil dari setiap negeri.

Menteri Pembangunan Usahawan dan Koperasi, YB Datuk Ewon Benedick dalam majlis yang sama menyatakan komitmen KUSKOP untuk terus membantu memperkasa golongan penjaja dan peniaga kecil selaku penyumbang utama kepada pengukuhan dan kestabilan ekonomi negara.

Hadir sama, YB Senator Puan Saraswathy Kandasami, Timbalan Menteri Pembangunan Usahawan dan Koperasi, YBhg. Dato' Sri Suriani binti Dato' Ahmad, Ketua Setiausaha KUSKOP dan ketua-ketua agensi KUSKOP.

**KEMENTERIAN PEMBANGUNAN USAHAWAN DAN KOPERASI  
PUTRAJAYA**